

Program da la regenza sut la marella

Deputads nizzegian l'ocasiun da s'exprimer

■ (anr/rgd) Il program da la regenza per ils onns 2017–2020 è vegni commentà e criticà er en il decurs dal segrund di da la sessiun da favrer. La sessiun da favrer dal parlament grischun è stada er il mardi sut l'ensaina dal program da la regenza. Quest program è vegni tractà minuziusamain punct per punct. In grond dumber dals deputads e da las deputadas ha nizzegia l'ocasiun da commentar ed inqual giadas era per exprimer critica.

La situaziun dal turissem fa quitads
La stagiun d'enviern pauc satisfacenta occupa per il mument la populaziun dal Grischun. Er en il parlament ha la situaziun da la pli impurtanta branscha economica dal chantun procurà per fastidis. En connex cun la debatta en il parlament davart il program da la regenza per ils onns 2017–2020 èn divers deputats s'exprimids tar quest tema. *Philipp Gunzinger* (pld, Scuol) ha fatg attent als problems da la branscha. «La situaziun è ordvart precara, cunzunt en las regiuns», ha intunà Gunzinger, «per regiuns periferas n'existan quasi naginas alternativas al turissem.» Ina schanza vesa Gunzinger unicamain tar la combinaziun dal turissem cun il sector da la sanadad. «La populaziun daventa adina pli veglia e resta adina pli ditg sauna.» Questa gruppa da la populaziun pudess tenor Gunzinger gidar a dar nov schlantsch al turissem en il Grischun. *Heinz Dudli* (pbd, Tschintg Vitgs) ha intunà l'impurtanza da la libertad d'interprender en quest sector, che stoppia vegnir garantida entras regulaziuns respectivas da vart dal chantun. Sco represchentant d'ina destinaziun turistica ha *Adrian Steiger* (pld, Trin) preni posiziun per il turissem: «Il chan-



In grond dumber dals deputads e da las deputadas ha nizzegia ier l'ocasiun da commentar ed inqual giadas era per exprimer critica envers il program da la regenza.

FOTO O. ITEM

tun duai sustegnair l'infrastructura da basa ch'è relevanta per l'entir sistem.» Plinavant ha el pretendi dapli sforzs per promover il turissem da stad.

Pli grondas sperditas ch'èn auters chantuns

En il Grischun han cunzunt las grondas destinaziuns turisticas pers en ils ultims onns cuntinuadamain cifras da pernotaziuns. Il congual cun autras regiuns da turissem d'enviern en Svizra n'è betg gist plaschaivel. A las diversas dumondas dal

plenum davart las differenzas en congual cun il Vallais u la Surselva bernaisa ha respundi cusseglier guvernativ *Jon Domenic Parolini*. El ha fatg valair ch'il chantun Grischun s'haja occupà memia tard ed a moda memia flaivla per attrair giasts da las fieras da terras da l'ost sco la China. Il deputà *Rudolf Kunz* (pld, Cuira) ha fatg la dumonda a cusseglier guvernativ Parolini sch'il chantun haja l'intenziun d'acquistar terren per pussibilitar la construcziun dad hotels. Sumegliantamain agescha il chantun er en

auters secturs da la promoziun economica. Ina cumpra da terren entras il chantun n'è dentant betg sin l'emprim plaz da la glista da prioritads dal chantun: «Tenor la lescha n'è in tal acquist da terren betg exclus, dentant er betg previs en ils proxims onns», ha respundi Parolini.

Producents d'energia idraulica en las stretgas

Divers deputads han rendi attent a la situaziun precara da la branscha da pro-

ducciun d'energia idraulica. En consequenza als pretschs sbassads en ils ultims onns sin la fiera d'energia internaziunala n'è la producciun d'electricitad betg pli uschè profitabla sco ina giada. Deputada *Margrit Darms-Landolt* (pcd, Glion) ha preni posiziun en chaussa: «L'energia idraulica ha in'auta muntada per l'entira economia ed è ina part da la vieuta d'energia.» Ella s'engascha per in sustegn dal chantun per las interpresas d'electricitad. *Ueli Bleiker* (pbd, Tumulstga) ha pretendi che la branscha da producciun d'energia electrica suonda als pretschs. Durant la debatta ha il deputà *Jon Pult* (ps, Cuira) dà ina part da la culpa er a las interpresas sezzas. «Avant intgins onns udivan ins adina da la largia d'energia che smanatschia, ed uss avain nus ina surproducciun.» Qua hajan la interpresas d'energia almain ina cunresponsabladad. Deputà *Reto Cramer* (pcd, Belfort) ha fatg attent che la crisa actuala tar las interpresas da producciun d'energia idraulica saja ina crisa temporara. D'ina tala interpretaziun n'ha perencunter il deputà *Andy Kolleger* (pbd, Cuira) vuli savair nagut: «La producciun da forza idraulica è en la staziun intensiva e vegn a restar là.» En sia risposta al parlament ha il minister d'energia grischun *Mario Cavigelli* intunà ch'il futur da la societad vegnia ad esser electric. Pli e pli daventia la producciun da tala decentrala, per exempel cun l'erecziun da novas chasas energeticas. «La forza idraulica è libra d'emissions, fiscalmain fitg effizienta, cumprovada ed indigena», ha ditg Cavigelli. El ha dentant er fatg attent che la soluziun dals problems da la branscha d'energia giaschia la finala en la cumpetenzza dal stadi federal a Berna.